

Kolosi

Nəgkiariien sə rani mə nəfe i nəkukuə

Kolosi in nəkukuə sə ro kahar i Pol rımərai nəpın in ramarə ia kalapus fwe Rom ia nəpın riti ipaka ti nuk 59 uə 60. Epafras revən fwe Rom mını pen ti Pol mə nahatən eikuə me nepwın fwe Kolosi kamhahatən nərmama mə nahatətəien səvənraha ia Kristo rıpkəmwhen mhə. Nahatən eikuə me nəha hamahatən irəha mə tuhəfwaki m nagelo me, mhesi pen natuakəmien me nepwın, mhəsiai mwi nəpın ikinan me nepwın. Pol rırai nəkukuə i revən ti nirəha mə tuhaməkeikei mhərər əknekın, mhəpwəh nətərigien ia nahatən eikuə me nəha. Kristo in rasori ia narimnari me pam. Nemhəien səvəi Kristo in əpa ruvehimıru kitaha ti noien ərəha me səkitaha. Iesu rıfi nari ia kitaha tsəpwəh mwi nisaiien natuakəmien me səvəi iərmama.

¹ Iou Pol, iou aposol riti səvəi Iesu Kristo ti nəri nə mə Kumwesən rıməni nəkwan mə tako, mine piəvtaha Timoti.

² Nəkukuə i rauvehe tukumiaha nərmama me səvəi Kumwesən fwe taon nəha Kolosi.

Kimiaha nə piəvmaha me hiəməuvehe mho ku-atia kimiaha Kristo, hiamahatətə pərhiien irə.

Pwəh Kumwesən Tata səkitaha trəriari pehe namasanien mine nəmərınuien m kimiaha.

Nəgnəginiien mine nəfwakiien

³ Nəpɪn me pam, nəpɪn kɪmaha iahaməfwaki tukumiaha, iahaməni tanak ti Kumwesən i in Tata səvəi Iesu Kristo Iərimənu səkitaha.

⁴ Iahaməni tanak tukwe in ti nəri nə mə iahəuvəregi raka mə kɪmiaha hiamahatətə əknekɪn ia Iesu Kristo nənə mamhokeikei pik nərmama me səvəi Kumwesən.

⁵ Nahatətəien mɪne nokeikeien səkɪmiaha ro iamɪnhi irə ti nəri nə mə hiəukurən amasan ia rerɪmiaha mə Kumwesən truvei pehe nəfe nari sə rɪnəpnəpenə irə m kɪmiaha fwe ia neiai. Hiəuvəregi raka narimnari me nəha ia nəgkiariien pərhiən, in i nəgkiariien amasan səvəi Iesu Kristo.

⁶ Ia kwopun me pam ia təkure tɪprənə nərmama kamhəni irəpw nəgkiariien amasan səvəi Kristo, nənə raukuə mamə kwənkwan mauverə mamə amasan nɪmɪruien səvəi nərmama me həpɪk. Rəmwhen a mwɪ ia kɪmiaha nəpɪn hiamregi mhəukurən nɪpərhiənien nəha ia namasanien səvəi Kumwesən, nənə rauverə mwɪ mukuə ia nɪmɪruien səkɪmiaha.

⁷ Epafra rɪnahatən kɪmiaha ia nəgkiariien nəha. In iərmama riti səkɪmaha iahokeikei pik in, iahamo tukwini pəri nari kɪmaha min. Kɪmaha iahəukurən nətɪgiteien irə, ramasitu ia wok səvəi Kristo maməgkiari tukwini səkɪmaha.

⁸ In rɪməni pehe tukumaha i mə nokeikeien səkɪmiaha rasori raku pen ti Nənɪmwɪn Ikinan.

⁹ Ro iamɪnhi irə nəpɪn iahəregi nəvisaiien nəha, nənə iahaməfwaki tukumiaha ia nəpɪn me pam, mamhəres mə kɪmiaha tihəuvehe mhəukurən amasan pam nəkwai Kumwesən ia nukurəniən sə raku pen ti Nənɪmwɪn səvənhi.

10 Ro iam̄inhi irə mine k̄imiaha tihamarə ia narəien atukwatukw sə ramo lərimənu səkitaha rerin ramagien, mamhəukuə kwənk̄wamiahaha ia noien amasan me pam, nənə ia nəp̄in me nukurəniēn sək̄imiaha truvehe masori mwi hiəukurən amasan mwi Kumwesən.

11 Iahaməfwaki mə n̄iskaiien asori səvəi Kumwesən tro k̄imiaha hiəskai nəp̄in nərəhaiēn truvehe, pwəh hiərəer əknek̄in ia nəp̄in me pam, nənə mho nətərigien sək̄imiaha rəpwəmwis, nənə mamho k̄imiaha hiamagien

12 mamhəni tanak ti Tata Kumwesən ti nəri nə mə in rino k̄imiaha mə hiəukurən nuvehi pəriēn nautə k̄imiaha nərmama ikinan me səvənhi. In rinəmri karen nautə nəha ia kwopun rukuraan ikin.

13 Iakani iam̄inhi irə ti nəri nə mə in ripeci raka kitaha ia n̄iskaiien səvəi nəpitəvien, mipeci pen kitaha ia nitətə sə Tini keikei ramərimənu irə.

14 Tini rifi nari ia kitaha, mo mə Kumwesən trəpwəh nərpwinien noien ərəha me səkitaha.

Kristo in rasori ia narimnari me pam

15 Tini Kumwesən in rəmwhen atukwatukw ia Tata səvənhi sə səpkətoni mhə. In nəmritaik sə in rasori ia neiai mine tiprənə mine narimnari me pam.

16 In rasori ti nəri nə mə in rino pam narimnari me nəha, narimnari me səməme samətoni mine səməme səpkətoni mhə, kig me, uə ieni mə, uə nənimwin me səməme kamhəuvehi nasoriēn

1:10: Fil 1:27, Efes 2:10 **1:11:** Efes 1:19, 3:16 **1:12:** Efes 1:11,18 **1:13:** Luk 22:53, Efes 2:2 **1:14:** Efes 1:6,7 **1:15:** 2Kor 4:4, Jon 1:18 **1:16:** Jon 1:3,10

mine narimnuien. Narimnari me pam naha, Tini Kumwesən rino irəha mə səvənhi.

¹⁷ In riməkupwən marə ia narimnari me pam, nənə narimnari me pam kamharə ti nəri nə mə niskaiien səvənhi raməkwtəmhiri irəha.

¹⁸ In rasori ia nakalasia me səvənhi irəha həmwhen ia nipwran in kənkəpwə. In nukunen, iərmama sə riməkupwən mətui mwi ia nemhəien səvənhi, ro pen in ramasan ia narimnari me pam mukupwən.

¹⁹ Kumwesən ramarə pam ia reri Tini mukuər irə. Nənə Kumwesən rerin ragien pwəh ro iamınhi irə.

²⁰ Rerın ragien ripekı narimnari me pam ia təkure tiprənə mine ia neiai hənəvisə irəha min, muvi simwin pehe irəha ia tini, nənə məmri nəmərinuien ia niten sə rinaiu ia nei kamarkuauı.

²¹ Fwe kupwən kimiaha hiamarə isipwin ti Kumwesən. Hiaməmwəki in ti nəri nə mə rerimiaha ramrhi ərəha in, nənə mamho noien ərəha me.

²² Mətə təkwtəkwuni, ti nəri nə mə Tini ruvehe iərmama məmwhen ia kitaha, memhə, ro pen Kumwesən ro kimiaha hiəuvehe in me nepwin. In ro iamınhi irə mə trərpwi irapw kimiaha ia nənimen hiatukwatukw pam,^a mhəmher, kəpwəh nətoniien noien ərəha riti səkimiaha.

²³ Mətə tihaməkeikei mhəmwur pen ia nahatətəien səkimiaha, mamhərer əknekın irə,

1:17: Jon 1:1, 8:58 **1:18:** Efes 1:22-23, Wok Me 26:23, Rev 1:5

1:19: Jon 1:16, Kol 2:9 **1:20:** Efes 1:10, 2:16, Rom 5:1, Efes 1:7, 2:13, 1Jon 2:2 **1:21:** Rom 5:10, Efes 2:12, 4:18 **1:22:** Efes 2:14-16, Efes 5:27 **a 1:22:** Uə “kimiaha nəkur ikinan me səvənhi.”

1:23: Efes 3:17, Hip 3:14, Mak 16:15, 1Tim 3:16

mhəpwəh nikiukiuien, mhəpwəh narakaien ia noien sə hiaməmri pen əknekɪn nətərigien səkimiaha ia nəgkiariien amasan nəha hiəuvəregi raka mine nəfe rani. Kinəvisau irapw raka nəgkiariien amasan nəha ia kwopun me ia tɪprənə. Iou Pol, iou iərmama riti sə iakamasitu ia wok nəha.

Pol ramasitu mamsese ti nakalasia me səvəi Iesu Kristo

²⁴ Təkwtəkwuni rerik ragien a mə kamo nəmisəien miou tukumiaha.^b Ia nəmisəien me i iakamregi ia nɪpwɾak, iakamrɪpɪn pen a mammo sampam ia nəmisəien me səvəi Kristo səməme in rɪmərəgi tɪ nɪpwɾan. Nɪpwɾan nə in nə nakalasia me səvənhi.

²⁵ Iou iərmama riti sə iakamasitu ia nakalasia me nəha. Kumwesən rɪnəmri pehe wok i ia rəgik mə takasitu ia kimiaha, məvisau irapw pam nəgkiariien səvənhi m kimiaha.

²⁶ Nəgkiariien nəha in nəgkiariien riti səvəi Kumwesən rɪnərkwafə tɪ nərmama fwe kupwən, mətə təkwtəkwuni nəha Kumwesən rɪno pui m nərmama me səvənhi.

²⁷ Kumwesən rokeikei mə tro nərmama me nəha səvənhi hətoni mhəukurən mə nəgkiariien nəha in rɪnərkwafə i truvei pen nautə amasan m nərmama rɪpko mhə irəha nəkur Isrel. Nautə amasan nəha Kristo ia rerɪmiaha, iəmə sə hiamətɪgite irə truvei pehe nasoriien m kimiaha ia neiai.

1:24: Efes 3:13 **b** **1:24:** Pol raməmak fwe ia kalapus nəpɪn rɪrai nəkukuə i. Kalapus nəha in nəha nəmisəien sə Pol raməgkari irə ia vas 24. **1:25:** Efes 3:2,7-8 **1:26:** Rom 16:25-26, Efes 3:3-5,9-10
1:27: Efes 1:18, 1Tim 1:1

²⁸ Kristo naha, kimaha iahamani irapw in, mamhəvəhag m nərmama me pam, mamhahatən nərmama me pam ia nukurənien me pam, mə irəha pam tuhəuvehe mhəmruə ia noien səvəi Kristo, nənə iahərpwi irapw irəha ia nəmri Kumwesən.

²⁹ Ia noien naha iakaməmwur mamsese tukwe mamesi pen niskaiien asori səvəi Kristo sə ramo wok ia nimiruien səiou.

2

¹ Iakokeikei mə tihəukurən mə iou iakamsese pik tukumiaha nəkur Kolosi, mine nəkur Laotisia, mine nakalasia me pam səməme həpkətoni raka mhə nənimek ia nəpən riti.

² Iakokeikei mə takasitu ia nirəha pwəh həregi ramasan fwe ia rerinraha, mhəuvehe mho kuatia mhokeikei irəha me, mhəukurən amasan nīpwrai nəgkiariien pərhiən nənə mhəuvehi namasanien me pam səvəi noien i. Ro iamənhi irə irəha tuhəukurən nīpwrai nəgkiariien sə Kumwesən rinərkwafə i fwe kupwən. Nəgkiariien naha in Kristo,

³ iəmə sə Kumwesən rinərkwafə pen nukurənien amasan me pam səvənhi irə.

⁴ Iakaməgkiari iamənhi irə m kimiaha ti nəsisəgien ia nəgkiariien eikuə me səvəi nərmama sə rəsien mavi raka nətərigien səkimiaha.

⁵ Nīpərhiənien, nīpwrak rīpkarə mhə kimiaha min, mətə iakamarə kitaha m kimiaha ia nənīmwiik. Nənə rerik ragien pik ti nəri nə mə

1:28: Efes 4:13 **1:29:** Efes 3:7,20, Fil 4:13 **2:2:** Efes 3:4,18,
Kol 1:26 **2:3:** Aes 45:3, 1Kor 1:24,30, Efes 3:19 **2:4:** Rom 16:18,
Efes 5:6, Kol 2:8 **2:5:** 1Kor 5:3

iakamətoni mə nətəriɣien səkimiaha kuatia a, nənə hiamahatətə əknekin ia Kristo.

Nərmama me səvəi Kristo nimiruien səvənraha ruvəuvehe muvəukuər raka

⁶ Ti nəri nə mə kimiaha hiəməuvehi Iesu Kristo mə in Iərimənu səkimiaha, nənə tihaməkeikei mharə ia narəien kuatia kimiaha min.

⁷ Tihəkwtəmhiri əknekin in rəmwhen ia nuai nei raməkwtəmhiri əknekin tiprənə. Nimiruien səkimiaha traməkeikei mərər əknekin irə rəmwhen ia nimwə sə ramərer əknekin ia tiprənə. Nahatətəien səkimiaha traməkeikei miskai ia nəpin me pam rəmwhen kinahatən raka kimiaha irə. Nənə ia nəpin me pam tihaməkeikei mhəni tanak m Kumwesən.

⁸ Nərmama nəpwın nəha irəha kamhəni mə hokeikei pik nukurəni. Mətə nəgkiariien səvənraha ro neikuəien i, nipwran riwən, ti nəri nə mə ramesi pen a nahatəniən səvəi nərmama mine nənimwın me i irəha nukune noien me səvəi tiprənə i. Nəgkiariien səvənraha ripkesi pen mhə nəvisaien ia Kristo. Tihamətui amasan mə nərmama me nəha tuhəpwəh nərkwiien kimiaha ia nəgkiariien me səvənraha.

⁹ Iakani iamınhi irə ti nəri nə mə iərmama nəha Kristo, Kumwesən ramarə pam ia nipwran mukuər irə.

¹⁰ Nənə ti nəri nə mə kimiaha hiəməuvehe mho kuatia kimiaha min nimiruien səkimiaha ruvəukuər raka nari riti mwi riwən tihaməkeikei mhətui. Kristo in rasori ia nənimwın me pam səməme kamhəuvehi nasoriien mine nərimənuien.

2:7: Efes 3:17, Efes 2:20-22

2:8: Kol 2:3

2:9: Jon 1:14,16

2:10: Efes 1:21-22

¹¹ Nənə ti nəri nə mə hiəməuvehe mho kuation kīmiaha min, kuvəuvehi raka ninhum m kīmiaha. Mətə nuvehien ninhum nəha iakani rīpko mhə sə nəha iərmama riti ro ia rəgin, rekəm. Iakani nuvehien ninhum nəha Kristo rino mərai raka noien ərəha səvəi nīpwramiaha.

¹² Nənə nəpīn kīno paptas ia kīmiaha, kīnimwi kīmiaha kīmiaha min. Ia paptas nəha kīməuvehi utə mwi kīmiaha hiətui mwi ia nemhəien kīmiaha min, ti nəri nə mə hiamahətətə ia nīskaiien səvəi Kumwesən. Ia nīskaiien nəha in rino Kristo rətui mwi ia nemhəien səvənhi.

Ia nei kamarkuau Kumwesən rīfi nari ia nərmmama me səvənhi

¹³ Kīmiaha nərmmama rīpko mhə kīmiaha nəkur Isrel kəpwəh nuvehien ninhum m kīmiaha ia nīpwramiaha, fwe kupwən rəmwhen mə hiəuvamhə raka ti nəri nə mə hiənamo noien ərəha me, mətə Kumwesən ruvei pehe nīmīruien vi m kīmiaha nəpīn rino Kristo rətui mwi ia nemhəien səvənhi. In rīnenouenou raka noien ərəha me pam səkitaha.

¹⁴ Nəkukuə nəha rərəha ia kitaha kīmərai pen noien ərəha me irə səkitaha mə tukərpwīn pehe m kitaha, Kumwesən ruvəuvehi raka raka nəkukuə nəha irau nəgkīariien me səvəi Loa səməme kamhərkwi kitaha, məruī tərini pen ia nei kamarkuau. Ro pen in rīfi nari ia kitaha.

¹⁵ Ia nei kamarkuau Kumwesən rətēfi nīskaiien səvəi nənīmwin me səməme kamhəuvehi nasorīien mīne nərīmənuien. Rəmwhen mə rərihi tərini rəginraha, miri irapw irəha ia nəmri

nərmama, mahatən pen mə ruvəuvehi irapw nɪskaiien səvənraha ia naruagənien.

¹⁶ Ro pen tihəpwəh nəseniien iərmama riti rəkiri noien səkimiaha ia nɪkaren səvəi nəfe hiamani uə hiamənɪmwɪ, uə ia nɪkaren səvəi nəfe hiamo ia nəpɪn ikinan me, uə nəpɪn səvəi məkwə vi, uə sapat.

¹⁷ Narimnari me nəha həmwəhen a ia nənɪmwɪ nari sə rəpwəh ihi nier peheien, mətə nɪpwran in Kristo.

¹⁸ Nərmama nəpwɪn nəha irəha kəmhəni mə nərmama tuhaməkeikei mhəuvehi irapw nətərigien səvənraha nənə mhəfwaki m nagelo me. Irəha kəmhəni nəgkiariien nəha mamhərer ia nəməkrəhaien me səvənraha səməme hənətoni. Kimiaha tihəpwəh nukurirəien irəha kamo hiarfai ia nəfe nari hiamaiu tukwe. Nərmama me nəha kəmhəfiəutə ia nɪrəha tɪ nəri nɪpwran riwən, mamhəni nəfe ruku pen tɪ nətərigien atukw səvənraha.

¹⁹ Irəha həpkəkwtəmhiri əknekɪn mhə Kristo, mətə in rəmwhən ia kənkəpwə iərmama. Kitaha səmwəhen ia nɪpwrai iərmama nəha kwənəkʷus me hərkwi tərini kwopun nɪkəkʷrin me rɪrɪpɪn ikin. Nəpɪn Kristo raməkʷməni kitaha nənə kitaha pam səuverə ia nuverəien sə ruku pen tɪ Kumwesən.

²⁰ Kimiaha hiəuvəmhə raka kimiaha Kristo. Hiənaraka raka raka ia nənɪmwɪn me i irəha nukune noien me səvəi tɪprənə i. Mə ro iamɪnhi irə rəfo kimiaha hiamarə ihi rəmwhən kimiaha nərmama me səvəi tɪprənə? Rəfo kimiaha hiaməsiai natuakəmien me i kəmhəni iamɪnhi irə mə,

2:16: Rom 14:1-12

2:17: Hip 8:5, 10:1

2:19: Efes 2:21, Efes

4:15-16

21 “Tikəpwəh nuvehien, məpwəh nəni əghanien, məpwəh nırapıien”?

22 Natuakəmien me nəha kamhəni nəveginien mine narımnari me hiani uə hiəuvehi nənə triwən mwi. Kamhesi pen nətərigien mine nahatəniən səvəi iərmama.

23 Nıpərhienien, rosi nərmama me nepwın kamhətə mə natuakəmien me nəha ho nukurəniən i ti nəri nə mə ikamesi pen maməmwur mə tikəfwaki skai m Kumwesən, mauvehi irapw nətərigien səim, nıpwram raməmisə i. Mətə natuakəmien me nəha ko həpkasitu mhə mhəsisəg noien ərəha səvəi nıpwrataha.

3

Nərmama me səvəi Iesu Kristo tuhaməkeikei mharkahu ia nımıruien vi

1 Ti nəri nə mə Kumwesən rino kimiaha hiətui mwi ia nemhəien kimiaha Kristo, ro pen təkwtəkwuni nəha tihaməkeikei mhətui narımnari me fwe irənhə ia kwopun nəha Iesu raməkure ikın ia nıkare Kumwesən mwatuk.

2 Nətərigien səkimiaha traməkeikei məmak ia narımnari me fwe irənhə, mətə trəpwəh nəmakien ia narımnari me ia təkure tıprənə i.

3 İakani iamınhi irə ti nəri nə mə kimiaha hiəuvamhə raka, nımıruien səkimiaha kınərkwafə pen ia Kumwesən kimiaha Kristo.

4 Nımıruien pərhien səkitaha in nə Kristo. Nənə nəpın Kristo trırərig pehe mwi, Kumwesən tro nərmama pam hətoni Kristo mine kitaha,

2:22: Aes 29:13, Mat 15:9 3:1: Kol 2:12, Mak 12:36, 16:19, Efes 1:20 3:2: Mat 6:33 3:3: Rom 6:2, 2Kor 5:14 3:4: Fil 1:21, 1Kor 15:43, 1Jon 3:2

nənə irəha tuhətoni namasanien mine niskaiien səvənhi.

⁵ Ro pen kimiaha tihaməkeikei mhəpwəh anan noien ərəha səvəi tɪprənə me i: nɪpran mine nərman kamhəiri əpnəpen irəha me, irəha kamho noien ərəha sə ro a naurisien, mamhokeikei pɪk irəha me tɪ noien ərəha, nətərigien səvənraha rukuər ia noien ərəha, rerinraha ramakres (noien nəha rəmwhen mə kamhəfwaki pen m nənɪmwi nari me).

⁶ Noien me nəha kamho niemaha raməpi Kumwesən. Tɪpko mhə tui in ruvehe mərpwɪn noien ərəha me səvəi nərmmama me nəha səməme kamhərui nəkwən.

⁷ Fwe kupwən kimiaha mwi hiamarə mamho noien ərəha me nəha nəpɪn noien ərəha me nəha kamhərɪmənəu ia kimiaha.

⁸ Mətə təkwtəkwuni nəha tihaməkeikei mharaka pam ia nɪrəha: niemaha, nətəpaharien, nəmwəkiiien iərmama, nɪniien nɪkare iərəmə, mine nəgkiariien əmkemɪk sə raku pen ia tərhui iərəmə.

⁹ Tihəpwəh neikuəien ia kimiaha me, tɪ nəri nə mə hiənəpwəh raka nɪmɪruien akuas səkimiaha mine noien ərəha me səvənhi,

¹⁰ nənə mharkahu ia nɪmɪruien vi. Nɪmɪruien vi nəha in nəha iərmama vi sə Kumwesən rino, mamərməvi ia nətərigien səvənhi mə truvehe məmwhen irə.

¹¹ Tɪ nəri nə mə kitaha səuvəuvehe mhəno nərmmama vi me ia kitaha nəri auər a mə ik iəmə Isrel uə rɪpko mhə ik iəmə Isrel, kuvehi ninhum mik uə kɪpkuvehi mhə ninhum mik, ikukurən amasan

nari uə ipkukurən amasan mhə nari, ik slef uə rīpkō mhə ik slef, mətə Kristo in narimnari me pam, mamarə ia reritaha pam.

¹² Kimiaha nərmama Kumwesən rīmərfi kimiaha. Kimiaha nərmama ikinan mine nərmama keikei me səvənhi. Ro iamīnhi irə kimiaha tihaməkeikei mhəuvehi pen nīmīruien vi nəha səkīmiaha rəmwhen ia karkahu səkīmiaha. Kimiaha tihaməkeikei mhapi ti nərmama, mho ramasan mīnraha, mhəuvehi irapw nətərigien səkīmiaha, mhəpkəfiūtə mhə ia kimiaha, mho nətərigien səkīmiaha rəpwəmwis,

¹³ mhəpwəh nəsenien niemaha rəpi akwauakw kimiaha. Trīni mīnuə iərmama riti ro rərəha ia kimiaha riti ramasan mə hienouenou i. Iərimənu səkīmiaha rīnenouenou noien ərəha me səkīmiaha. Ro pen kimiaha mwi tihaməkeikei mhenouenou noien ərəha me səkīmiaha me.

¹⁴ Nənə irənhə ia noien me pam nəha, tiharkahu nokeikeiien sə ravi tərini amasan narimnari me pam həuvehe mho kuatia.

¹⁵ Nənə pwəh nəmərīnuien səvəi Kristo rərimənu ia rerīmiaha, ti nəri nə mə Kumwesən rīnəkwein ia kimiaha mə tihəuvehe mhousəsīmwin rəmwhen nīpwrai iərmama kuatia mharə ia nəmərīnuien nəha. Nənə ia nəpīn me kimiaha tihaməkeikei mhəni tanak m Kumwesən.

¹⁶ Pwəh nəgkiariien səvəi Kristo ramarə pəpwīə ia rerīmiaha, hiamahatən mamhəvəhag m kimiaha me ia nukurənien me pam. Tihani nīpu me ia nəkukuə nəha Ol Sam, mine nīpu me səvəi nəfwakiien, mine nīpu me səməme kamhəuku

3:12: 1Tes 2:9, Efes 4:2,32

3:13: Efes 4:32, 5:2

3:14: Rom

13:8-10, 1Kor 13:13, Efes 4:3

3:15: Fil 4:7, 1Kor 12:13,27, Efes 4:4

3:16: Efes 5:19

pen ti Nənimwɪn Ikinan, mhəgnəgini Kumwesən mərerimiahā ragien tukwe.

¹⁷ Narimnari me pam səməme hiamō, mine nəgkiariien me pam səməme hiaməni, tihamo mamhəni ia nəghi Iesu Iərimənu səkītaha, mamhəni tanak m Tata Kumwesən tukwe.

Nəvəhagien revən ti nakalasia me ia nimwə me səvənraha

¹⁸ Kimiahā nīpran me, tihaməkeikei mhəšiai nərman me səkīmiaha. In nə noien atukwatukw nīpran me kamhahatətə ia Iərimənu tuho.

¹⁹ Kimiahā nərman me, tihaməkeikei mhokeikei nīpran me səkīmiaha, mhəpwəh nometəien irəha.

²⁰ Kimiahā nəkwərhakwərha me, tihaməkeikei mho nəkwai tata mine mama me səkīmiaha ia narimnari me pam, ti nəri nə mə noien i ramo Iərimənu səkītaha rerin ramagien.

²¹ Kimiahā tata me, tihəpwəh noien nəkwərhakwərha me səkīmiaha niemaha rəpi irəha, kamo nətərigien səvənraha rīmwei.

²² Kimiahā slef me, tihaməkeikei mho nəkwai nəmə asori me səkīmiaha ia tīprənə i ia narimnari me pam, mətə tihəpwəh noien nəpīn kamhətoni a kimiahā rəmwhen ia nərmama səməme kamhəmwur mə tuho nərmama rerinraha ragien, mətə tiho ia rerimiahā pam mhehekīr Iərimənu səkītaha.

²³ Nəfe nəghin hiamō, tiho ia rerimiahā pam rəmwhen hiamō tukwini nari m Iərimənu səkītaha, rīpko mhə hiamō tukwini nari m nərmama.

3:17: 1Kor 10:31, Efes 5:20 **3:18:** Efes 5:22 **3:19:** Efes 5:25

3:20: Efes 6:1 **3:21:** Efes 6:4 **3:22:** Efes 6:5-8

²⁴ Kimiaha hiækuræn mæ Iærimænu sækitaha truvei pehe nærækuien atukwatukw sævæi narimnari me sëmæme hiamō. Nærækuien næha in rinæmri karen raka mæ sævæi nærmama me sævænhī. Iærimænu pærhien sæ hiamō tukwini nari min in næ Kristo.

²⁵ Mætæ iærmama sæ ramo ræræha truvehi atukwatukw mwi nærækuien sævæi noien æræha sævænhī, ti næri næ mæ Kumwesæn ramo ramæmnæmwhen m nærmama me pam.

4

¹ Kimiaha næmæ asori me, tihamækeikei mho ratukwatukw m slef me sækimiaha pwæh ræmnæmwhen a. Tiho iamihī iræ ti næri næ mæ hiækuræn mæ kimiaha mwi hiamaræ tegin iæmæ asori riti. Iæmæ asori næha in fwe ia neiai.

Nævahagien me nepwīn mwi

² Kimiaha tihamækeikei mhæfwaki m Kumwesæn ia næpin me. Næpin tihæfwaki iræ, tihæpwæh napriien, mamhæni tanak m Kumwesæn.

³ Tihamæfwaki mwi tukumaha mæ Kumwesæn træsevær ia tæpinhæ tukumaha pwæh iahæni irapw nævisaiien ia Kristo sæ fwe kupwæn ramærkwafæ. Nægkiariien i in i iakinani irapw nænæ kuvehi puvnimwæ iou ia kalapus tukwe.

⁴ Tihæfwaki mæ takini irapw nægkiariien næha træmher amasan ræmwhen a mæ takamækeikei mo iamihī iræ.

⁵ Kimiaha tihamækeikei mho nari ia nukurænien ia næmri nærmama iruæ me mhæpwæh nætæ waiien ia næpin riti sækimiaha ti nuvi peheien iræha.

3:25: Rom 2:11 **4:1:** Lev 25:43,53, Efes 6:9 **4:2:** Efes 6:18, Fil 4:6 **4:3:** Rom 15:30, Efes 6:19, 1Kor 16:9 **4:4:** Efes 6:20 **4:5:** Efes 5:15-16, 1Tes 4:11-12

⁶ Pwəh nəgkiariien səkimiaha ramasan ia nəpɪn me məsien rəmwhen ia nəveɣɪnien kuvei pen sol irə, nənə tihaməkeikei mhəukurən amasan mə tihəfo irə mhəripwen nəgkiariien səvənraha kua-tia kuatia.

Nəgkiariien sampam

⁷ Tikikas trəvisau irapw pam noien me səiou ia kwopun i m kimiaha. In piəvtaha keikei riti sə kimaha iahəukurən nətigiteien irə, ramasitu mamō tukwini nari m Iərimənu səkitaha kimaha min.

⁸ Takərhi pehe in tukumiaha ti noien i, mə in tro kimiaha hiəregi ramasan, mini irapw tukumiaha mə iahaməfarə irə.

⁹ In truvehe irau Onesimas, piəvtaha keikei i kimaha iahəukurən nətigiteien irə, in iərmama riti səkimiaha. Irau trouəvisau narimnari me pam ia kwopun i m kimiaha.

¹⁰ Aristakas in ramarə ia kalapus kimrau min, in rani ramasan tukumiaha. Mak, piəvi Panapas sə karen, in mwi rani ramasan tukumiaha. Mak nəha, kimaha iahəuvəni pehe raka tukumiaha i mə kimiaha tihaməkeikei mhəsevər ia rerimiaha tukwe trini minuə ruvehe tukumiaha.

¹¹ Nənə Josua Jastas in mwi rani ramasan tukumiaha. Ia kwənəkwus me səvəi nəkur Isrel səməme kamhəni nɪpərhiēnien ia Iesu, iəmənmirəhar i irəhar əpa kamharowok kimaha minraha ia nɪkaren səvəi nɪtətə sə Kumwesən ramərimənu irə, nənə irəhar harnasitu pɪk ia nirak.

¹² Epafras, iærmama riti sækimiaha sə ramo tukwini nari m Iesu Kristo, in mwi rani ramasan tukumiaha. Ia næpɪn me rerɪn ramrhi kɪmiaha ia næfwakiiɛn me səvənhi, mamæres Kumwesən mə kɪmiaha tihærer æknekiŋ mhəmruə nənə mhækurən amasan narimnari me pam səmæme Kumwesən rokeikei.

¹³ Iou iakəsəni mə nɪpærhienien in ramo wok skai ti nasituien ia kɪmiaha, mine nækur Laotisia, mine nækur Hierapolis.

¹⁴ Luk, tokta keikei sækitaha, mine Temas, irau krauni ramasan tukumiaha.

¹⁵ Tihəni tukwini ramasan səiou revən ti piəvtaha me fwe Laotisia, mine prən nəha Nimfa, mine nakalasia me səmæme kamhousəsimwɪn irəha me ia nækwai nimwə səvənhi.

¹⁶ Næpɪn tihəvsini raka nækukuə i səiou, nənə tihamækeikei mhərhi pen i revən ti nækur Laotisia mə irəha tuhəvsini mwi m nakalasia me fwe ikin. Ia noien a mwi nəha, kɪmiaha tihamækeikei mhəvsini mwi nækukuə səvəi nækur Laotisia.

¹⁷ Nənə tihamækeikei mhəni pen ti Akipas mə in tramækeikei mo pam wok sə Iærimənu sækitaha riməuvei pen min.

¹⁸ Iou Pol iakauvehi næri kamrai nari irə mamrai a ia rægik nægkiariien səvəi niniien ramasan m kɪmiaha. Tihəpwəh nenouenouiɛn jen me i kɪnərihi iou irə. Pwəh namasanien tramarə tukumiaha.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416